



孫文簡公全集

卷十二之十五

五言古詩三

五言律詩一

孫文簡公灑溪草堂稿卷之十二

門人楊豫孫 董宜陽

朱大韶

編輯

門人張承憲 高士 校正

男克弘 從孫男友仁校刊

五言古詩

貞軒詩

世變既云下古道日澆漓奔趨競成俗翕訛營其私
富貴苟可得寧計節義隳鄙哉邪佞子婦女留鬢眉
吾觀貞軒翁挺拔人中奇衡門養高潔食力聊自宜

立心羞婀娜制行無傾欹安貧靡卑屈樂道無憂疑
朝彈猗蘭操夕歌考槃詩不求兒童憐只許天公知
譬如百尺松不作妖妍姿又如百煉金不作繞指隨
夷齊空山守采薇可充飢誰言原憲貧商歌自怡怡
斯人雖云遠逸駕非難追願翁保令德終始期無虧
古意

美人生南國絕世多妍姿窈窕如遊龍青楊宛娥眉
與我結綢繆恩愛兩不疑青蠅一朝集白壁生瑕疵
恩情中斷絕棄我忽若遺盈盈對面問邈如天之涯
感今復念昔使我長嗟咨

展謁孟廟

稽首孟夫子萬古道學宗七篇沂源流乃與洙泗通
義利王伯辨日星麗蒼穹拳拳救世心績視禹稷同
早年事唔咿童子咕呶功及茲詠聖涯鑽研愈無窮
茲晨出祠下瞻謁展敬恭巍巍泰山尊恍若親德容
道術喪千載異論方訥訥無由起夫子爲我摧其鋒
天理有至正吾道惟大中叩公公不言涕淚沾心胸

和題擊甕圖

我思賢哲人不與尋常肩方其髻鬣日事業先可占
溫公當年事誰把丹青傳偉哉擊甕時仁智亦兩全

公昔相元祐忠義稱名賢誰知及物功已見成童年
人心妙不測運用合機權試看此兒嬉伊誰教能然
古今一俯仰人物成灰烟我心良悠悠浩嘆秋風前

奉題涯翁集句錄後

郡伯內江喻先生得涯翁集句錄二卷將鏤
之梓寄予校正訛誤既已畧訂數字偶得鄙
句僭附卷末

我思李夫子篇章蓋其餘平生製作外攬古爲嬉娛
藉之發吾真陶寫亦自如浩穰諸名家精采畢獻輸
譬之大盈府充牣隨所湏木難兼火齊瑤瑛與瓊琚

蒐羅盡瑰珍見者心神舒元戎統六師揮斥熊與羆
簫韶八音備琴瑟諧笙竽組織欵天巧劑量極錙銖
渾無斧鑿痕若以一氣噓翁才實兼人不受繩墨拘
驅役混古今約束誰能逾太行與王屋移易來庭除
天吳及紫鳳裁割衣與裾若和五鼎味若貫八寶珠
江淮河濟漢異派而同趨隔世覲顏面一席相唯俞
富哉方寸中載此萬卷書再思半山老高名照寰區
繼作有文山耿耿忠義俱今人即古人三賢固無殊
坡翁真戲劇其論亦甚迂見公定俯首愧悔稱起予
君侯重文事愛此輕璠璣授予欲何爲秉筆校魯魚

淺薄諒非任茲意不可虛但恐襲金根有識同揶揄

秋懷和荅友人戴師觀五首

清宵不能寐起坐發哀吟明月照高樓浮雲起層陰
百年宇宙內慷慨憂思深所思亦何似世故萬感侵
四時更代謝光景易銷沉丈夫志事業念此那能禁
美人隔秋水傾想遺嘉音報酬媿無侶擬托雙南金

其二

月明姜被寒掩映成獨宿天涯若飄泊念我親骨肉
春風吹荆花負此正芬郁慈闈奉晨昏不得共粟菽
憂來浩無端清淚動盈掬蕭條鵲鷓詩展卷不忍讀

嗣音又踈曠引睇佇雙足明發當有至燈花結新綠

其三

美人生南國麗質耀目明與我結綢繆執手瞻三星
並縮同心結雙吹紫鸞笙中道忽睽違迢遞京國行
繆通金閨籍欲去羈功名空齋耿思憶我豈如長卿
遙遙天涯夢落月屋梁停媿無縮地術黯然傷我情

其四

楊朱泣岐路墨翟悲素絲習染當自擇去適慎所之
流光俯仰中昨者非今時請看桃李花倏忽成空枝
努力崇令德妍精寄幽詞少壯一無能老大徒嗟咨

仙人不可學漫託餐玄茲落日不返照逝水無回期
古人賤尺璧此語當三思

其五

肅肅風振業冥冥雨翻盆羈人悄無事兀坐掩重門
朱炎何有哉暫得免蒸燔澄神任偃仰澹默靈臺瞰
簡冊有真趣几席無囂煩興來發嘉句亦復開清樽
落魄澆愁腸經營役吟魂須臾華月上耿耿依黃昏
蕤蕤庭下樹小結濃雲屯放情六合外飄飄凌紫氛
讀秋水篇
茲辰適在告幽齋有餘閒端居淡無慮俛默神自全

時抽架上書得閱秋水篇達生寄深旨乍覽意不宣
䟽觀大化中物物各自便小大無等差秋毫眇坤輿
逍遙通大道冥思入幽玄泛泛涉滄溟浩浩無津埏
我今亦忘吾會意應無言行雲適高楹好風入踈簾
倦來復拋書支頤任頽然豈不畏踈散局促尤自賢

寓感四首

白日在天上明兩以作離人君發天德普照亦如之
浮雲纖末生倏見昏陰茲玄象有混闡懷歌盛明時

其二

牛性不司夜大力不任耕鉛難鑄作劔杙豈勝爲楹

致用苟越分懷羞堪俯膺驅駑駕遠道縱常濟滄瀛
所憂在顛溺旦夕爲怔怔柰何相逢者尤懷欣羨情

其三

人生宇宙內苦被日月驅賢豪凜英聲際時步亨衢
談笑生風雲咳唾落明珠余光照海宇惠澤沾寰區
有如縱壑鯨豈比涸轍魚朝侍未央殿夜宿承明廬
煌煌炳勲業瑣瑣誰能如

其四

楚趙昔從約糾力抗秦師遴選才智士便給如風飛
毛生本無聞翩然請囊錐鄙哉平原君胡乃昧先知
從行亦碌碌側目空睢盱侃侃數語間兩國定深期
從來豪傑士未遇識者誰

賜扇

天門啓閭闔百辟依彤墀中官出傳宣賜筵無尊卑
元臣 帝股肱受此乃其宜顧臣亦何人得荷乾坤
慈炎蒸方在候効用真及時雖非金玉貴爲用良珍
竒金星點素質落落明珠璣在昭古先訓入眼光陸
離臣非諸葛侯白羽揮軍師亦非晉謝安仁風慰群
黎惟堪坐玉署斂衽哦詩書爾時一披揮習習來涼
颺格言荷聖教佩服真臣師致身明時用得此良艱

希天恩誠浩蕩報答容臣私常聞古忠良因事納箴
規臣亦有悃誠上告天王知惟昔有虞氏聰德無偏
遺製茲曰五明睿知勤疇咨亦有周武氏仁恩遍敷
施道逢暘死者手執此自揮惟茲二聖人懋治誠致
致以茲虞周世萬載歌無為吾 皇睿作聖秉德恒
謙撫願惟時風若今古同雍熙

冬月同諸友遊永樂寺飲旺公房分韻得野字

蕭條沍寒候浩蕩風振野吾人亦好事乘興來蘭若
意豈在行樂欲識棲禪者上人本空寂風度亦蕭洒
慧朗鑑在懸論辨長河瀉為陳西來意超悟愧吾寡

未能三乘通誤謂四大假冉冉妙香度翩翩花雨下

坐久

微雪匆匆具盤飧灑灑酒盈筓綢繆師意勤感媿我

顏楮抗別復須臾題詩信聊且

送張侍御巡鹽淮南

張君西江英秀色出天表名聲凜臺端玉立真皎皎
浩蕩四方志溟渤一杯小淮壖有新命冥鴻羨輕矯
斥鹵窮東南國計豈毫杪歲久法茲玩流弊劇瀾倒
傷哉醯丁艱軫念心悄悄流移骨隨枯存者顏色稿
貪墨誅求遍豪滑侵漁巧以茲弊百出未易一一了
君誠濟時才柄用苦不早通融有長策至理在探討

水霜肅妍究陽春輯流俘恩威兩得所夙靈期一掃
秋風吹蕭蕭旭日照杲杲贈言不及他持此永爲好

送張之訓

長風起天末遊子念高堂高堂不可見累疏陳明光
曰臣有老母孀居凜秋霜一別十載餘甘旨不得將
區區烏鳥情一念慘衷腸

皇心悅其孝父子還故鄉錫以金泥書雲漢昭天章
稽首叩帝闈長揖別友生歸興逸難遏心與雲飛翔
春日方皞皞春風亦揚揚行哉莫遲遲白頭正相望

題張陽峯太史卷

喑喑復喑喑集我簷前鳴巖翁且至止檠戟臨門庭
兩年隔天涯瞻雲每惓惓今朝拜膝下高堂溢歡聲
翁既載欣慰有子沐恩榮昔著青衫別今來錦衣迎
兒亦載欣止承顏慰私情昔別固康強今來倍精明
子歸亦忻忻中庖出瓊烹僮僕亦忻忻趨將奉杯觥
孫枝復榮秀蘭芽覩寧馨怡怡子父歡天倫樂難名
相過日無虛雜還皆朝英陳搏與列俎擊鼓還吹笙
人事苦難齊此樂尠得并因茲感余懷涕淚沾冠纓

苦熱

今日不可出畏景蒸炎熇崔巍火雲行勢欲焚層霄

乾坤一爐冶天地同煎熬初疑河海竭又訝山岳焦
生人蟻虱然衆口均嗷嗷而我坐斗室局促增煩勞
對案不能食尚暇筆硯操馮陵發大叫欲去不可逃
安得呼風姨捲地驅長飈徒懷杜陵句赤腳凌瓊瑤
煩紆漫自苦澄凝覺逍遙造化生萬物意匪殃吾曹
輕筵聊自揮漸喜風蕭蕭俛仰神內融散適形俱超
我熱良可舒感事增鬱陶忽憶山之東寇盜方驛騷
哀哉六月師卓午腰弓縶濟時愧無術撫已徒叨叨

送張君分教華亭詩

江右張君積學久屈今年以貢得分教華亭

余固華亭人也於凡吏吾土者得一良輒喜
之矧得明師如張君者爲喜不尤至歟小詩
非賀君實爲吾鄉賀也

良金須陶冶美玉籍雕琢二用苟弗良不若鑛與璞
張君西江彥賦性甚溫朴讀書三十年雄劍霜鏗竭

來貢明庭奉檄專教鐸行食松江鱸去聽華亭鶴吾
邦號多士濟濟見犖卓君行諒無忝於道乃先覺臯
比仰師模披衿分唯諾問閭講唐虞蕭蕭陳禮樂案
牘無俗勞衣冠有真樂雖乏官資崇得免名號濁公
相豈不貴賦命有厚薄勢分何足言食祿要無忤方

今崇文教君去勿落莫明秋期奏功得士當倍作

觀奕

空堂手談誰剝剝驚戶外袖手余亦閒看此兩敵對
勢多楚漢強地割鴻溝界歛拓互闔關錯縱明向背
攻圍盛行陣隱伏妙機械竒出風雨交冥搜鬼神會
爭雄不相能奪雋詎容貸時移方一畧妙處得三昧
彼云聊優游我謂無勝敗疾呼君太狂頽頽子真隘
一挫未應餒收局還可再茲藝未足賢徒食聖所戒
送同年馬進之弟省兄歸
別淚弗可忍離愁浩難祛行行送將歸執袂又躊躇

我昔同元方瓊林曳華裾元方凜凜堂端名聲等璠璣
子來專省候千里命輶車西堂動詩興天倫足懽娛
念舊亦過我荷子意勤渠英英玉堂質快覩珊瑚珠
玄雲忽相渝萍蓬邈難居回首瞻故鄉歸葺先人廬
風雪豈不慘欲發不須更我心良儻陶元方定何如
天有赤羽鴈水有紅尾魚明年二三月望子平安書
聞玉河水聲有作

獨騎款段出落日背高城行行過玉堤忽聽潺潺聲
會心豈必遠一笑兒童驚坐我瀑布傍冷然洗中局
長安盛車馬輪蹄日轟轟向來通市中無此裕俗清

利名世所競獨茲人不爭會當即堤邊卑棲結吾楹
飽聽日無厭不使塵囂生

吳北川許海味不至訊以詩

我本東海人旅食越兩載緬懷故鄉味厭說天庖宰
故人吳季子慙歎許分待腆意未拜嘉初約忽中改
得非多遺忘無乃甚欺給咲予太早計停筋想風采
小詩當催逋還勝百錢買會富入吾泔腹中有東海

東園八詠

讀書堂

虛堂亦幽幽藏修任昏昨研精典籍間俛仰見前古

君家有書香弩力期接武不似東隣翁唯堪貯歌舞

叢桂庭

中庭何所有丹桂儼成行朝露浥華茲秋風吹古香
名門擅今昔毓秀非尋常會多青雲侶遠紹燕山芳

吸月亭

獨酌明月下流光正徘徊長歌邀明月落我樽中醅
掀髯和月倒一吸空樽壘謫僊如可作此地應追陪

悠然亭

幽興渺無極攝衣陟層臺天空飛鳥沒萬里長風來
南山自嵯峨遠覽心神開懷哉彭澤翁難與俗子諧

聯碧池

甃池自成趣左右拱吾亭西池水初滿東池泉又生
浮光碧練淨倒影青天澄時來鳧鷖侶欲共幽人盟

王虹軒

一泓湛寒碧源脉自中泠紆徐蜿蜒然汨汨繞前楹
凭軒聊徙倚可以濯塵纓浩歌滄浪吟千古有餘情

翠雲屏

小結作屏幃翠色日苑舊宛宛如雲屯亭亭當戶見
常凌風雨交不逐朝暮變深秋搖落時猶可勝一面

雪香林

吾闈東園勝乃侶羅浮村英英姑射寂寞回春溫
千枝綴晴雪萬蕊迎朝暎徘徊自索笑欲起逋仙魂

秋日雜詠

詠山居

山深秋意早地僻人跡闕落葉滿庭戶涼氣襲巾烏
泉流雨澗深徑轉風蹙逼野鹿時或過山鳥鳴更寂
岩壑浮晴嵐几席映佳色柱頰哦霜晨持杯吟月夕

詠溪居

卜築枕流溪秋水清渠渠可濯亦可漱可烹蕪可漁
菰蒲日與鄰鳧鷖日與居驚風吹薜蘿疎雨洒庭除

灘聲入座涼野色納窓虛長歌考繁吟頽仰心自舒

詠村居

幽居自村落僻遠無市喧禾黍依夕照桑麻宿輕烟
深巷荷鋤歸兒女迎門前鷄豚入栖柵牛羊下郊原
鄰父有好懷時來話田園食力寡心累濁酒供年年

詠城居

薨連復井給犬吠雜鷄鳴西風簾幙靜返照樓臺明
授衣及新涼家家動清砧垂帘酒肆列入市魚舟腥
田翁售新穀野老販溪菱人歸闌闌空昏鴉噪埤城

詠京城

都城列萬雉宮殿切五雲清霜鳴曉角祥光擁朝曦
周羅民庶居窈窕王侯門重譯萬方貢聖永一人尊
亨衢連廣陌馳驟復驚輪稽首莫治功萬載歌洪勳

詠禁省

月臨仙人掌風生承露盤曙色尚熹微秋色凜高寒
千門俱洞開六龍駕輿鸞陛戟用虎旅鈞陳列鵷班
蕭韶奏雍雍劔珮鳴珊珊惟應多瑞氣日繞蓬萊山

詠郊野

落日下平蕪遠水涵晴空西風正搖落澹靄何冥濛
千山生夕陰一望遠近同草色迎霜白楓林借春紅

平坡散歸羊雲外號征鴻依依野人村處處聞高春

詠田家

白露被西疇穉行可稽秋來喜多晴場圃除殖殖
鑣鉦各爲操任負翁媪憚兒童拾稗穗鷄母啄狼粒
共言歲事豐租稅期早畢不有三時勞何能一時逸

詠漁家

生涯惟網罟結廬雲水鄉舟橫斷岸淺門對清溪涼
潮引滄波遠風吹白蘋香中流朝鼓楫芳洲晚鳴榔
煙凝林樾暝鳥沒青天長倦來卧蓬底一曲歌滄浪

詠酒家

柳橋橫翠檻竹籬出青旗清樽浮綠蟻香羨薦銀絲
經霜橘初熟輸芒蟹新肥歡迎滌噐傭嫵媚當壚姬
騷翁解遺囊豪客駐金羈高陽有餘興風月剩堪題

詠妓館

青樓映朱箔深院連曲房清颺滌殘暑白苧生微涼
銀箏御瑤席寶鼎煨沉香芙蓉紅隱褥芭蕉綠上窓
五陵屢經過千金賦高唐冉冉粉香叢長年樂未央

詠富家

榮華擅京洛甲第連朱甍院宇生微涼爲樂方稱情
新裁朱履潔乍試羅衣輕華堂日張宴飛蓋相追迎

吳兒與越女彈絲復吹笙酒酣歸洞房含笑擁傾城
詠貧家

陋巷少人跡依依長蓬蒿秋氣月凄凜四壁何蕭蕭
絺綌不掩脛饑殍但罇瓢御寒既尠具卒歲亦無聊
荆妻厭藜藿稚子慣山樵無端昨夕風捲我屋簷茅

詠旅舍

飄蕭墜寒葉寂寞虛堂秋遊子久行役索居寡良傳
明燈照空壁啼螿動羈愁情悵念悄悄川原邈悠悠
中夜起彷徨仰視河漢流萍蓬偶棲泊太息未能休

詠書齋

幽齋極蕭爽清秋無垢氛捲幔落遊絲辟蠹羅香芸
瑟清調流水硯冷生微雲拳石結新綠古鼎留餘薰
縹囊既零亂牙籤亦繽紛及時宜進修兀兀窮朝曛

詠閨思

清颿吹蕙帳明月照蘭房中宵念行役掩抑獨淒涼
微寒生薄衾思奉君子裳天涯渺阻修何由越川梁
昔如鸞與鳳今如參與商默默回誰訴悄悄徒自傷

詠故宮

西風吹黍離踈雨濕殘礎空梁長見日頽垣間餘堵
石馬索青羅銅駝沒黃土花容猶宮妝柳眼尚媚嫵

繁華等風烟形勝消龍虎惟有舊時月照人自今古
詠廢宅

人事已非昔遺居猶至今蕭條白晝靜寂寞黃昏陰
老樹集昏鴉敗砌寒蛩吟階空蚯蚓出壁古苔蘚侵
乾坤多變易頽仰易銷沉更無故主居獨有閑人臨

詠佛寺

秋氣日已佳况此緝宇寂古松蔭佛殿幽花照禪席
谷虛哭山鬼林暝啼木客風來語梵鈴雨至洒石壁
長廊獨徘徊蘿徑自捫歷時聞孤磬聲雲深杳難即

詠道院

新秋入琳館物意何蕭森露滴丹灶冷雲護芝房深
棋聲間竹院簫韶出風林千門鎖虛寂石壇晝陰陰
苔花繡古篆鶴唳流孤音清虛絕塵俗悠然生道心

詠古廟

古廟知何代蕭蕭秋日荒丹青既剝落香火亦淒涼
恠鳥號深林飢鼠竄空梁殘碑土花蝕蔓草過人長
蛛絲網破牖蝸牛上頽墻神理有消歇人事焉足傷

詠荒塚

孤兔竄古穴荆榛長荒丘西風吹白楊踈雨洒松楸
樵夫朝出歌牧兒暮來遊宰木給斧斤芻蕘飽羊牛

寂寞掩泉臺千古魂幽幽更無祭掃人空餘斷碑留
詠邊塞

窮邊秋氣早六月飛霜華胡兒弓力強馬跑蹶風沙
黃雲連白草極目天無涯孤城控險阨令嚴寂不譁
淒風傳畫角落日悲鳴笳征人於此際誰不動思家

題畫蘭棘

美人羞自獻空谷抱幽貞儵然絕塵俗誰結歲寒盟
荆棘豈不茂睠焉昧平生徘徊日將晚慨矣思靈均
梅庄詩
幽懷壓塵俗芟蕪闢新庄庄居何所有寒梅有孤芳

乾坤搖落時見此姑射收英英綴瓊珮燦燦明珠裳
紛紛卦涼月隆隆映朝陽豈無桃與李俗惡非所減
蘭蕙豈不好弱質易摧傷何如此花魁勁節飄寒香
主人冰玉姿對此形神忘亦有山中侶時來共徜徉
既讀廣平賦亦誅逋仙章未言調鼎彝且共嘗冰霜

孫文簡公灤溪草堂稿卷之十二終

孫文簡公灤溪草堂稿卷之十三

五言古詩

夜聞鄰兒讀書

東鄰誰氏子讀書夜無眠風吹吟語聲落我床頭前
我聞不復寐俯仰心茫然憶昔髫髻時早能讀陳篇
嬉戲不自力流光若奔川及茲未聞道老大徒悵悵
儒冠亦何有虛生亦堪憐誓言今其始勉心乾乾
鑿井苟弗已終見清冷泉

雨中過顏東郊

陰霾幕四野密雨紛如絲扁舟何所適野人有深期

我興良自佳僕夫苦淋漓壺觴雜釘餌草草隨所携
同行二三子聊與斟酌之樂事苦不全夙言每乖睽
有懷渺難招悵然起遐思

朱方齋吳春洲有約不至

扁舟蕩雙楫溪潤穿窈窕雨行良不惡况得所歷妙
依依墟里烟落落展遐眺冥濛雲樹昏荏苒風竹掉
高桑布谷鳴遠渚鶴鶴叫時惟農事急簑笠逮翁媪
小橋曲通村竹所期遙造不似山陰翁匆匆遽回棹

又

草堂極瀟灑水竹多幽深主人有好懷展席俯清吟
時花弄芳姿好鳥轉佳音薰風泛叢蘭飄飄滌煩襟

二子雙玉立勸我酒重斟適意豈在酒我病况靡任
人生合并難晤語愜素心數觴已陶然一笑忘古今

又

密雨漸細微流雲散清霽斜陽漏微明返照在水滢
晚晴人意佳起步行繞砌話言雜桑麻朴野有真意
我性本丘壑早已厭塵事龍岡有宅兆桑梓情所係
何當乞身歸與子結鄰契

又

千林暝色起日落西山坳牛羊時下來歸鴉恋其巢
興盡復言旋短棹風飄飄犬吠叢薄間漁火明江郊

星月澹微茫煜然吐林稍喧喧市聲近擾擾物役勞
我生本無期一笑樂亦聊但能無拘牽何地非逍遙

獨酌

春風散和燠霧斂天日晴揚翹吐華滋萬彙爭熙明
幽居寡相接而况塵俗撓興來命壺觴獨向簷前傾
好花當姬侍鳥韻笛與箏悠然自滿引浩笑春冥冥
美人渺難期俗物吁可憎小山差強意獨立當前橫
舉杯一勸之與子兩忘形山靈不解飲傲睨終古醒
我酌還自酬直欲空瓶罌頽然徑醉卧雲月爲枕屏

餉農過壠上

赤日正暉赫朝露暄以乾念我田中人胼胝多辛難
披衣過壠上不憚觸熱難醒風蕩炎氛草木俱焦顏
呼兒傾筐筥有酒兼有餐田父知我意感謝多欣歡
我今乃田畯自咲更自嘆無田均憐翁力薄非汝慳
佇立獨移時呼兒與俱還豈曰此爲勤吾意差少安

題松月卷

幽齋淡清夜長空斂浮烟素娥從何來宛宛落我前
髯翁矯而立顧影如矜妍相看本無期忘形更忘言
爲招山中相再酌騎鯨仙悠然對終夕不知清漏傳

示子效王川子

書齋坐清晝昧昧心弗怡阿松忽前來出扇乞我詩
阿松性沉嘿頗不喜施爲我疑乃頂魯但識栗與梨
今朝忽好事我喜爲解頤呼兒更來前听我好言詞
汝今十四歲非復髫鬣兒讀書吾家事誨汝良孜孜
讀書添智慧讀書破愚痴讀書爲賢良讀書佩朝裾
汝前當七齡頭角頗岐嶷何更七年來碌碌但如斯
豈汝誠質魯變化猶有期抑汝故懶惰懶惰無由醫
人生要樹立詩書乃鎡基利達且莫言賦命固不齊
但觀不學人何別隸與厮學庸及語孟精義要深惟
尚書最難讀功當百倍之考事貫今古摛文炳珠璣

今雖未能然爲學當視茲似汝恁陋劣萬難冀毫釐
吾又念世德承傳汝當思吾宗百年來詩禮人共推
穆穆抑齋老黌宮擁臯比汝祖雪岑公清名絕瑕疵
我雖勉繼述淺薄恒怩汝若不自立自汝隳門楣
汝觀東隣氏綽楔高巍巍有子不嗜學破敗共咲嗤
又觀西隣翁起家自茅茨有子立青雲里閤騰光輝
人生無愚智共識好與媿東西兩家子問汝當何居
光陰不我待日月相奔馳汝勿恃年小一去難再追
不信觀汝爺尚記髮垂垂轉眼亦幾何清霜點烏髭
少時不自力及此徒傷悲我家世清白囊橐無餘貲

文獻通考卷之十三
四
幸存薄田畝猶可供粥糜亦有書滿架古訓光陸離
役使有童奴免使執爨炊古人貧亦學勞苦身無資
我今雖淡薄不令汝寒饑汝若更不學此咎當責誰
只今當長夏俗事無牽縻願汝務學業毋徒習遨嬉
切磋同阿哥和鳴協埴篲莫似汝父懶失學悔後時
願汝崇明德忠信以自治入則孝爺孃出則敬友師
莫似汝父癖愆尤日潛滋莫起侈泰念淡薄守家規
莫習輕薄態執禮須謙卑但觀世上人浮侈終自隳
我今已四十精力會有衰汝年漸長大將以門戶遺
男兒貴自強奮發不可遲爺孃雖汝憐豈得長提携

世事不可料前程杳難窺賢不肖係人造物無容私
驥子始墮地骨相超等夷駘駘亦自別寧候異日知
如今亦稍稍我竊爲汝疑再看汝一齡便可分雄雌
恩義不相掩舐犢非爲慈汝不用吾言吾將汝鞭笞
告汝出苦語俯心轉歔歎勉哉不可忘一一鐫肝脾

示姪

剔蠹莫剔深愛木木反戕責子莫責深愛子成乖張
阿桂吾猶子天資頗馴良况復汝年歲當亦知臭香
我心良念汝骨肉情故長誨汝刻骨言汝母視尋常
今已年十七已列大人行願汝猶童兒立志殊未當

公孫文簡公集卷之十一
五
昔我京師歸汝肩始齊床忽忽七年過今已似我長
我目多閱人英俊如雲翔弱冠富文學下筆鏗琳瑯
汝負讀書名茂裂無一強汝腹自空虛汝貌徒昂臧
我每憶汝父九原杳茫茫死者不可作感我涕淚滂
食桃棄其核有子委路旁骨肉天性真有子焉得忘
昔汝父早歲多才能文章亦復敦行誼有志馳四方
恨哉賦命薄未立輒已僵天道久必復或欲於爾償
我今誠念汝念汝湏扶將有言不汝告如瞽行俛俛
戒汝莫嗜酒嗜酒志意荒戒汝莫遊俠敗家之斧戕
莫羨不義富金玉積滿箱爾目不知書馬牛而冠裳

莫羨不義貴炙手猶沸湯爾能富德業金紫來煌煌
阿桂听我言汝意得無傷汝今已解事諒我無別腸
古聞幾卿義我視猶慙惶王基意則厚吾不爲汝望
但願汝卓立門戶得汝光汝若不自強伶俜辱爺娘
子賢子不肖嘉穀與莠稂爲穀與爲莠在汝自較量
人生亦多事門戶要劬勸我今漸潦倒期汝早激昂
我意良觀縷筆舌難盡詳知汝省念無拊心但茫茫

題畫草

春風一披拂萬彙呈華滋寸草萌枯莠各復爭芳菲
大哉天地仁發育無偏私黃鍾鼓橐籥一元運其幾

誰與爲此圖毫端吐春熙高者搖華風下者揚芳蕤
么麼彼何者蕭蕭亦翺飛分明太極意未許夫人知

雨後步園中

滂沱鳴中宵清朝散微旭黑雲變而霽雨意猶未足
小園偶信步襟抱豁煩燠濯我畦中蔬蕤蕤淨如沐
平原獨鶴下淺渚群鳧浴天風動踈篁鏗戛萬綠玉
端居覽衆妙幽賞捩心目孤吟無與酬長嘯振林木

觀園丁除草

中園種嘉蔬地瘠蔬葉稀蔓草雜其間復爾纏綿之
六月盛炎暑亭午張赫曦園工力芟鋤根株俾無遺

造化普發育雨露無偏私去惡佑善良人事理則宜
蘭蕙生當門斬刈不得辭矧爾惡類繁不去將何爲

督園丁種蔬

懶拙寡生事興在田園中學圃非爲痴我與樊子同
種藝宜及時刻罇藉爾傭王政著月令在汝敢弗供
肉食豈可常淡薄儒家風何曾費萬錢自以遺厥凶
小圃無寬畦連延亦橫縱異爾發育茂由食倘可克

紀鳥

小園遠塵市水竹頗幽深上有枝柯稠下有灌莽深
有鳥名不識結巢在其陰日夕勤嘯嘯啁啾多清音

吾意憐此鳥不異籠中珍不敢語人知懼有兒童侵
野狸孰告汝竊伏伺無人睢盱欲攀緣探巢恣噬吞
幸我適見之惻然爲驚奔急爲驅之去愛護意彌勤
黃口亦易長旬日毛羽新隨母共上下喧呼各欣欣
好生物我同並育天地仁及物豈吾力聊以慰此心

中庭植小花數種戲述

中庭小作砌種植紛群葩園丁昔好事移自西隣家
汲水勤灌溉張席亦周遮經時土流膏倏已抽萌芽
逮茲花葉稠紅白爛交加雖無姚魏富幽艷亦可嘉
豪門事珍玩田家重桑麻戲劇吾亦誣聊爲兒童誇

與友人草堂小酌

閑居寡晤語二妙喜過從倒屣竹徑間焚香草堂中
呼兒具鷄黍杯盤媿匆匆所貴意味真豈在品物豐
雲陰暑氣微左右動涼風但恐日夕至不計樽罍空
話言及出處惜我性乖傭人生貴自適顛蒙詎能同
酒酣起縱步銀蟾已生東長揖送二妙矯首冥飛鴻
觀群兒捕魚

秋來久無雨溪小落欲乾茸茸聚衆魚煦沫猶自歡
群兒競蹇裳不暇具綸竿舉手如拾塊相矜共誼謹
脫者能幾何鱗鬣半摧殘白小莫比數汨沒泥水間

老夫濠梁興悠然每凭欄戒兒勿盡取致爾口腹饒
生平耳目隘境外江湖寬安得徒汝楫相忘渺濤瀾

送鍾君陞廣東僉事

送君秋色裡歌我春雲篇春雲亦何爲變化玄黃間
昔君署秋曹商律行秋權秋雲自蕭森摘伏催神奸
今君被寵命名藩職旬宣春雲乃油油着物盡成妍
爲霖澤枯株焦稿多生顏悠揚本無心舒卷道自全
從龍會非遙覆冒連八埏輪囷復氤氳作瑞歌豐年

使交發雲間

赫赫奉

王命迢遞絕域行茲當別故國促裝戒晨征時維八
月秋雲物肅以清舟人理桂楫天風引長旌丈夫四
方志意氣衝冠纓腰間雙鑊干虹霓吐晶熒姻戚羅
祖餞亦腹勤友生

天書照玉節顧瞻羨光榮豈知遠遊子莫釋內顧情
高堂有慈闈素領霜雪明忠孝不自謀百年負深誠
仰天嘿無言拊心但惇惇

錢塘

錢塘名都會山水多清妍層城填華屋巨棟相鈎連
歌吹日無虛笙簫間絲絃通達接廣陌車騎何喧闐

我來屬清秋况值昇平年遊觀邦人士日醉湖堤邊
維茲盛官僚地主多時賢喜予斯文契邂逅意亦虔
名山古招提板遊列芳筵登臨誠雅懷王事靡敢愆
萬里方此始心旌日懸懸顧此簡書畏我行敢淹延

西湖

東南饒湖山開此佳麗境澄湖一萬頃倒影鏡光淨
遠山翠屏紆近山晚妝靚禪閣鬱岩嶷雲外發鍾磬
畫船如畫屋搖蕩波不定芙蓉明的歷魚鳥樂飛泳
林祠與岳墓瞻拜得所敬林祠竹梅疎岳墓松栢勁
緬思南渡後文物亦云盛偷安湖山樂氣勢遂不競
國緒綴旒危夷狄豺虎橫茲惟堪逸遊未足擬形勝
腐儒感興亡吊古發孤詠酒酣促歸駕日落烟水暝

虎跑寺

輶車任登登山徑繚而曲深邃得蘭若傑構聳岩谷
林空號鼙颺境僻走麋鹿寄迹亦偶爾一住且信宿
禪房木榻淨石鼎妙香續跑泉虎已逝清冽猶可掬
煮茗試酌之一洗腸胃俗蒼珉窅深刻坡翁有遺躅
詞翰兩絕妙光彩照林麓平生丘壑情苦被
王事促山僧念遠行舉手向我祝是身浮雲然再至
渺難卜匆匆出門去浩蕩看鴻鵠

羅利江

江風吹征衣扁舟渡空闊曙色漸開朗遠岫橫一抹
悠悠滄波去澹澹孤鳥沒中流擊簫鼓啞啞棹歌發
夷猶蕩漁艇舉網魚潑潑帆檣亂高下來去若超忽
扣舷發清嘯客懷頗軒豁一杯酌胥神吊爾忠義骨
山川渺天涯未可計日達顧茲習暇豫瀟灑送日月
無徒念前程坐使心慘怛

釣臺

發軔富春驛艤棹嚴陵灘緬懷隱士踪訪古登巉巖
峩峩釣臺高寂寂空江寒日曠塵襟開天遠浮雲開

惟子秉高節卓立超人寰紛紛仕進者視子莫敢班
出處各有道要在義所安矯激非中庸汨沒斯貪頑
王事有程期寸心劇飛翰登舟渺回首烟水空漫漫

草萍驛

山行忽終日日落風颼颼蒼然暝色起原野烟光浮
依稀見村落兒童逐歸牛山徑叢竹深鳥雀聲啾啾
萬物已偃息我行良未休驛吏走倉皇再拜候道周
顧之問前途爲予指林丘入門華燈列山醪獻新茗
空堂耿無寐百感不自由惺惺待明發起坐聽更籌

東鄉縣

廿里忽一村十里忽一郵行行歷重山長途邈悠悠
惟茲鄉土異山田已微收村墟頗蕭條深林叫鈎輶
况聞多寇盜逢人肆虐劉茲邑實鼎建劫掠始得休
陰雲黯然至林木深已幽大雨忽滂沱泥塗滿行輶
僕夫歎柴扉請此盍少留咄嗟行路難悵然增煩憂

南昌

今秋氣候異九月猶炎蒸客行苦馳驅弭節南昌城
茲邦實巨鎮人事相類仍招邀荷地主踈傭怯承迎
思惟庚辰變叛逆干天刑兵戈苦騷屑殺戮何縱橫
我行經故墟鳴禽寂無聲慘淡來悲風酒帶戰血腥

壯哉孫與許英風凜猶生無由寄一奠淚洒江濤清

漳墅鎮

解纜發洪都風順五兩輕烟波浩瀾漫極目如掌平
遙遙蕭灘驛望望臨江城不知此何方但聞鷄犬聲
桅檣密如櫛水際何縱橫要津實四達商賈多所經
壯年遠遊賦浩蕩江湖情向來守堂戶跼促孤此生

螺川驛

江上晚來雨濛濛濕秋光螺川屈重九負此節序芳
登高若無緣回首思故鄉粲粲籬下菊秋風爲誰香
故鄉日已遠愁緒日已長嶺海極天際前途杳茫茫

送僕從此回附書慰高堂扁舟忽不見引領空徬徨

十八灘

一灘橫我前一灘落我後巨石何巒巒拱向若迎候
大江日東馳勢若萬馬驟崩奔聲喧逐欲與萬石鬪
初疑坤輿翻又訝溟渤漏舟行稍弗戒頃刻不可救
可憐篙師力默祈鬼神佑昔人訓垂堂 王故敢自

咎

新城

南康南安之間居民築以禦盜

山行欲盡日得此原壤平樓櫓忽依然突兀橫孤城
入門市肆列鷄犬咸樂生費不藉公家版築以義成

茲城昔未有盜賊時憑凌茲城既云建禦暴得所憑
設險古有之要使良善寧修葺貴不廢無忘始經營
千山橫紫翠夕陽映霞明前途尚未暮驅車且須行

梅嶺

鷄鳴事晨征秣馬走長路輿夫雙足健峻巘若飛度
梅嶺不見梅翻訝傳載誤惟餘萬松樹夭矯入雲霧
駐節張相祠瞻拜想風度緘劄古洞幽白猿不可呼
平生詭茲山險遠驚寐寤茲來望家鄉忽忽慘情悖
王事有驅馳筋力疲世故白雲意何極慷慨歌陟岵

平浦驛

度領浪自悲登舟情更歡山川頗清曠少慰行路難
浮烟散孤嶼旭日生晴巒所喜瘴厲息寧計水滌軋
自南雄無水平浦路悠悠幾瀨復幾灘韶江計非遙漸聞
水漫漫聞韶州江始深故人從何來是日會吳舜弼報政海外還
附書不及詳匆匆報平安

韶陽

凌江一超忽日覺眼界新
蒼村落稀青山多白雲
行行過韶陽蠻語漸不真
衣服中土異竹幘革可紉
始見戴竹帽皮帽者暄然秋冬交氣候如深春
人行青靄中鳥啼榕樹陰韶樂久不作
郡有韶石舜南巡作樂于上鳳鳥亦不開

吊古空踟躕前山已斜曛

清溪驛

接浙復接浙

王事靡敢稽朝方辭赤水暮已宿清溪扁舟順流下
驟馬猶自遲雙檣劈浪花歡呼喜舟師亂灘不識名
巨石紛差差輕風助微瀾瞥過忽不知迢遞萬里道
客子多憂疑前途盡如然我行豈無涯

飛來寺

群山河糾紛遠望若無路舟行兩崖濶得此梵刹古
幽深白雲居窈窕青蓮宇細徑縈絕巘軒楹勢飛翥

深林鎖寒烟時有猿嘯侶地勝欣所逢仰睇久凝竚
登陟若未暇畧已得其趣須臾轉前山回首不知處

麻墟水

汙汙江波濶黯黯毒霧吐舟行麻墟口川原見深阻
疊嶂千萬重賊穴難比數西或連閩蜀東應接吳楚
居民與商舶劫掠莫敢禦無人向誰何況敢索征賦
我來值零雨寂寂無所覩竚立空嗟咨此獨非

王士

麟山驛

晨征聞曉猿客子愁欲絕淒風響枯葦石壁掛缺月

古駟臨水涯隱蔽山萬疊麟山名空存豺虎日噬噬
嶺外甫浹旬風景迥爾別佩刀猶衣袵自此以南無
不佩刀者
疇能命其掣懷土心屢悲遠覽意頗豁媿無濟時術
猶有紀事札

蒼梧

扁舟謝逆浪泊此梧江潯孤城倚山顛下瞰江水深
茲惟百粵衝重鎮當喉襟轅門肅軍威殺氣常蕭森
重華不可吊四野雲陰陰水井泉尚活火山光已沉
夕霧蕪晨霏瘴厲方侵滯交南此半途行邁方自今
極目天南陞望望愁人心

鐵爐頂

舟行歷寒溪黯黯雲物暝昔聞鐵爐步今過鐵爐頂
鐵爐已無覩但見山水迴林木杳深黑巨石立昂昂
百里無炊烟山徑人跡屏頗聞舟人言日者屢傳警
潛過崖壑下僕從面目冷畏途真險艱嘿坐心怏怏

白馬堡

悠悠遠行邁道路日荆棘朝過白馬堡十二磯接跡
群山極深阻孤鬼時跳擲不知開關初何以恁阨塞
壘壘數十夫帶雨荷戈戟屯戍存空名緩急果何益
我欲極蒐薙盡使川谷滌恐此終不能回首長嘆息

相思洲

斷腸曾有峽漂神曾有灘如何此經行使我憂萬端
江濶風浪急逆上舟行艱况茲饒瘴厲雲水昏漫漫
故鄉渺何許身落千萬山不聞鄉土音惟見鳩舌蠻
王事苦未竣我行何時還感念少遊語悒鬱不可刪

斷藤峽

難束江水急一流忽旁分斷岸百尺餘儼若關兩門
人言茲峽中水勢常崩奔我來值冬日水退露石根
猿人負深阻巢穴蜂螳屯前聞肆屠劫犬豕相信信
峽旁少行舟過者斂精魂惴惴畏其出誰能問其津

昔年韓襄毅曾茲建殊勛
竭來幾何時江路復荆榛
煌煌秉使節旌旗耀江雲
萬里吾目中犬豕何足云

潯州

畏途何崎嶇落日江水黃
舉頭見潯州孤城倚高崗
蕭條市衢靜莽莽籬落荒
山田廢不耕四野多豺狼
邊臣勞輯柔寇盜蔑紀綱
感事增唏噓悄悄情內傷
兩岸擊刀斗竟夕嚴隄防
喧聲不能寐起視明星光
瞳瞳曉色動山鳥鳴且翔
揚舲復前征望望關山長

鳥蠻灘

洪波積浩蕩巨石何崢嶸
猊虎相攫拏角立俱猙獰
雄爲蛟龍翻洶作風雨聲
濺沫爲陰霏白日生晦冥
造化亦何意創此險不平
誰觸巨靈怒倒捲天河傾
艱危客意阻摧頽壯心驚
伏波有遺烈南有馬伏波廟吾行當乞靈

火烟驛

舟經火烟驛而不見烟火
火山圍白日陰頽石立磊砢
江流劇湍急激射如箭竒
百丈勞挽牽頓曳如驚跛
懸崖巧砌疊仰視畏欲墮
下有蘿薜封上有雲霧鎖
路險意彌切覽勝亦云頗
會當乘長風一鼓中流柁

白沙

扁舟凌洪濤日暮弭雙楫沙淨白如粲鬼燐乍明滅
好事吳將軍恭將吳宗來迎邂逅尊酒設為言盜賊繁干戈

日騷屑

當宁推轂勤閩外誰秉鉞哀哉此生民川谷日流血
遠信苦未真是日得交南信客子腸百結酒酣看吳鈞激烈
雙耳熱金柝喧兩崖畫角韻嗚咽酒散復別去空江

浸明月

南寧

理揖雖云遠長途豈容盡山城忽前橫喜及朗寧郡
人烟頗稠集阡陌少荒頓鷄豚雜喧囂竹木闢清潤

畏途多險艱愁緒日苦困此邦庶樂土一咲破孤悶
前征聞有陸召僕屢顧問夕陰忽新晴天意與百順
脂車復秣馬欲發待明暎

千龍寨

山徑一何惡一嶺復一溪初言舟行苦陸走更險巖
晨發千龍寨虺隤馬行遲偏側欲無路草深與人齊
依稀見村落竹屋多傾欹野人驚使節駭走如鹿麋
陽春遍海宇窮谷猶有遺諏詢苦不悉向風長嗟咨

忠州

連山橫巨鰲林木蒼烟重黃茆接天際一望不可窮

忠州暫弭節日落多淒風土酋服橐鞬執禮殊敬恭

知州黃之保地僻山徑惡使節古不通自來上司無

創行乃自茲詫訝驚老翁涉歷豈宿分窮荒寄行踪

平明登前途回首隔萬峯

太平

長原轉高崗徑路石磽确江流相迴環山勢亘綿絡

入城人跡稀白晝閉寂寞公館草樹荒飢鳥下庭啄

椎髻女媠醜短袵赤雙脚自此以南女媠衣飾盡然扶携趨朝虛

白髮裹青箬陸行多豺虎水行多鮫鱈慘慘客子情

觸口風景惡

屏巖

左江山多峭壁惟此獨峻

層崖何嶽崱下瞰江水立斬絕數百仞隱約蔽白日

嵌空猿猱居黝黑大古色若非鬼工鑿定是神斧劈

江風吹蕭蕭江水波蕩瀟扁舟經其下人細如蟻虱

壯遊茲行最歷覽難具述睥睨氣屈蟠凌跨神爽逸

村居不知名旁有村風物更簫瑟竒觀不有此何以慰

悒鬱

鐙勒驛

連山忽崖斷蕭條見村墟古驛但有名籬落同民居

驛吏跪沙際顏色慘不舒自言為祿仕寄迹豺虎區

乾坤有界限天角與地睽瘴厲日慘毒鬼妖日睚眦
使事豈不榮客懷日憂虞經行我猶然為爾增鬱紆

龍州

莽莽輿地闊煌煌使星明我行歷山川南徼越萬程
遠人識天使上官知州趙相再拜江邊迎舍舟歷荒郊蕭蕭
征馬鳴旌旗何悠揚落日喧鼓鉦群觀空里閭雜沓
兒童驚乾坤極覆載絕域俱

王氓旬宣古皇華淺薄媿弗勝平生之夢想中夜心
靡寧神京望不極矯首瞻青冥

發龍州

交南有事不果入

猶豫識每闇差池意徒勤炎荒一弭節忽忽越兩旬
交南已在即望望隔片雲天意限夷邦無緣被皇仁
翩翩返皇華言歸復茲晨重來或無期欲去還逡巡
行役豈不勞中止非我心使職自無狀仰首慚蒼旻

發蒼梧

悠悠客心驚冉冉歲華易春風吹天涯百草萎已碧
長江無勁鱗遠漢有倦翼萬里今此歸慰喜動顏色
樓船沸簫鼓東道勞祖席持杯心已慵解纜翻不懌
睠焉念初至有友生死隔崇禮先十七日卒鳥鳴喚其侶獸
鳴求其匹同來不同返惻愴涕沾臆

過梅嶺

歸途忽何鄉絕巘弭飛蓋梅關茲復登浩蕩豁眼界
峯巒出奇姿竹木露新態景物非有增自與人意會
山僧設茗供顧我喜健在瘴地已脫迹頗覺肝膽快
鄉心逐歸雲逸興軼塵壒矯首望故廬目極飛鳥外

贛江

昔從此路去今從此路回轉眼花石潭已失章貢臺
天公與便風知我又客懷船頭飛浪花噴激如瓊瑰
江水淨如洗征衣絕纖埃惟有方寸富萬壑并千崖
曠然心神超咲口天與開嶺表夢寐中回首何悠哉

桐江

桐江水清駛送我仙槎還好山過無數再見嚴陵灘
山中羊裘翁咲我歷險艱試汲中流清一洗瘴厲顏
春風曉來急苔磯兩斑斑舟行爲滯留天意故少慳
故園喜漸邇春事將闌珊且作看山行滯留非所嘆

抵家

春風蕩白日晨鵲噪庭樹遊子嶺表歸歡咲喜僕御
我行昔中秋丹楓落江渚歸來易歲華冉冉柳飛絮
顏色漸老蒼急景不少駐人生苦難保骨肉喜歡聚
上堂拜慈親入室撫嬰孺浮榮何足言一咲解百慮

孫文簡公灤溪草

稿卷之十三終

孫文簡公灤溪草堂稿卷之十四

五言古詩

東歸潞河舟中詠懷

朔風屆寒候凍日照行色遊子還故鄉雲鴻整歸翼
低回多慨嘆寂寞尠懽懌還鄉豈不樂撫事感今昔
前年使南荒瘴厲憂病疾今年走燕薊風霜忍寒栗
飄飄萍蓬踪萬里天南北勞生苦馳驅豈得頭不白
行行出都門悄悄抱悽惻顧瞻五雲闕萬感交併集
上懷 聖明主端拱在密勿憶昔臨御初臣忝侍從
職草茅兩封章海嶽効壤滴三年遠江湖心在斧戩

側所憂萬幾煩無乃近缺失一陰當六陽萌蘖已消
匿日中不恒居漸次見虧曷邇來時事新臣也所目
擊吁嗟是非辨要在慎決擇嗟峨九天高無路達忠
赤諫諍力匪任悲嘆腕空搯况今邊陲警日夜馳羽
檄強胡盛戎馬近甸暗長戟惟茲當嚴冬殺氣浩充
斥邊軍久疲弊何能冒鋒鏑矧是國計虛困廩數儲
積頗聞兵家要當先足藟食士飽躍而嬉馬飽騰于
櫪似茲寡預備何以支寇敵吾 皇念元元當宁頻
嘆息推轂遣重臣急若拯焚溺廟堂坐諸老精白心
一德豈無濟時略爲國建長策惟爾衆列侯金玉爛

輝赫時平竊恩榮光寵被臧獲無亦勉所圖少竭報
稱力詎應但安享徒耳氣盈溢乾坤際多事臣子致
命日惜也臣不武莫與荷及投空懷漆室憂竊抱杞
人惑况今遠 彤庭山川苦違隔以茲懷區區憂慮
何能釋同袍數君子意氣雅莫逆顧我多慰藉餞送
城東陌攄懷正諧洽分袂還倉卒共言厚自愛復道
長相憶嗟予乏曠懷當事易感激念此友朋誼怍怍
轉憂怒古言同心交燕越猶一室歲寒苟弗爽何必
勤面覲落日策蹇驢遠水浮畫鷁迢迢越川陸歷歷
過都邑旅情轉蕭條鄉思頗增劇故園三泖上望望

未能即吾園頗宜人地迴自幽寂逶迤接郊坵蕭森
帶泉石虛齋足偃仰平隴可登陟鳴鳥聲上下野竹
蔭蒙密竹吾甚愛之昔也手親植老梅臨水涯踈影
斜更直素葩抱幽香含笑待人索嗟予幽遁志中歲
遂成癖且當息塵囂聊適踈懶迹董帷猶可下顏樂
終靡易鳴琴白日靜讀易清夜聞野老容問字漁父
許分席玄化杳難知世事靡終極天傾五嶽峙我亦
空憾憾乾坤莽浩蕩歲月不再得惟慙百年內碌碌
靡稱述明明日月光照我巾與舄盈虛頗測究義利
亦分析樂天惟聖優乘運乃達識稽首羲皇占履二

保貞吉

草堂成漫述

小園理榛穢經始構此堂幽深既臨溪軒敞復面陽
土木乏巨麗規制亦頗良八窓開虛明炎暑生清涼
庭前數松樹屋後千篔簹了無紅塵侵似覺白日長
我性本曠寂遠謝名利疆况茲幽居成自喜素心償
臨風倚曲檻待月移方牀既以哦詩書亦可款壺觴
鯤鵬搏扶搖蜩鷺搶榆枋爲適各不同吾茲感蒙莊

星變

五夜天無雲列宿繁以張仰見東北隅恠事發異常

一星光煜煜芒吐數尺長上掃天心中斗柄爭低昂
河漢影清淺月色黯無光衆星漸稀踈獨與太白當
吾聞天垂象感召非杳茫歷考往牒中爲訓亦昭彰
仰惟吾 聖君秉心契陶唐夙夜勤萬幾四海異時
康災變亦何爲此理誰能詳三歲三見之簡冊所未
嘗草茅杞人憂時時熱衷勝巫咸不可問天道信詎
量矯首睇玄穹俛默心徬徨

擬古二十七首

季冬耿長夜朔風振喬林幽齋不能寐起坐發哀吟
美人曠千古遺我金玉音褰裳邈無從悵望空勞心

又

有鳥白鷺鷥來自東海潯雖無文采爛潔白羽毛新
飛飛集神州翾然揚清音威鳳儀朝陽和鳴叶韶琴
日短羽翼單天濶雲霧深鳳鳥苦不省鷓鴣將見侵
四顧羈旅孤愴惻反哺心會當乘便風復歸故山林

又

我有一良劔傳是古鏌鋇自信靡文飾埋沒溷泥沙
慘淡無晶光斑剝生鐵花世人亦有寶詡詡各自誇
磨淬明白雪本質固無加百金飾劔首金珠燦星霞
一朝售之市傳觀共稱佳我劔亦在側唾手爭喧譁

好惡莫容辨撫之自咨嗟什襲姑有待終必遇張華

又

上天示鑒戒災異何頻仍奏報四方至 聖心靡安
寧疇咨諸臣工渙汗揚大庭陳言裨缺違治道期一
更北斗酌元氣訐謨運權衡皇華走星軺恩波逮蒼
生於惟吾 皇聖格天以勤誠豈惟彌灾變三五行
可升

又

天於西北虧地於東南傾煉石補缺漏蹴山塞重溟
洪河稽天流象罔紛縱橫赤手障頽波萬古焉能成

漆室有隱憂非嘯隣婦驚其力誠何施其志良可矜

又

今日忽不樂駕言出遨遊遨遊亦何之迤邐登崇丘
纍纍有孤墳傳是古王侯野人不記省時來牧羊牛
長夜既寂寂泉臺未幽幽不論貴與賤寧識賢與否
人事有代謝榮華逝難留感彼牛山言使我涕泗流

又

邊隅近殺氣昴星燭天明長矢射漢月牧馬川原腥
揮霍風雨急劫掠鷄犬驚黑雲壓孤壘哭聲殞三軍
羽書日夜馳震動咸陽京 天子按劔怒含悽愍蒼

生徵調選材勇授鉞思豪英制敵在素豫得人壯長
城安得百頗牧坐使邊塵清

又

少年不識事負志殊慨慙陞小宇宙內思欲超八荒
舉身登日觀縱目臨扶桑兩手擎日月照耀無邊方
天道有隱幽世途有更張群居慙喻喻獨行媿涼涼
文豹亦霧隱神龍亦淵藏蹇予將柰何聊以永徜徉

又

金風振肅殺原野草木黃畋獵方及辰命侶百夫行
麗服多妍姿駿馬如龍驤拓弓作滿月鳴鏑飛秋霜

飛騰如猿猱捷下千仞岡飛馳與電逝矯捷莫可當
耳後生風聲鼻尖出火光俯身彊驅獮仰首射攬槍
妖狐無遁跡狡兔無留藏田獵何足言聊爾猛氣張

又

淳風日澆喪世道江河流傾危售奸欺咲談隱戈矛
得時鼠爲虎失勢鷹成鳩秦越可骨肉父子堪仇讐
天道既漠漠人事良悠悠誰能挽滄溟一洗生民羞

又

美人生南國佩服何芳菲采芝既盈纈攬蕙復充幃
慇懃遺夫君惘歎將有爲人心靡諒止衆女讒娥眉

明明仰先哲載籍有光輝吾義固匪愆後世定是非
惟彼古道湮使我徒傷悲

又

知人良不易毀譽多譁張人心殊愛憎衆口異雌黃
叔孫短仲尼軻謗由臧倉歐朱若人言君子爲豺狼
皎皎明月珠污泥閔其光蘭蕙豈不馥斬刈焉得芳
世事每錯亂顛倒迷四方棄置莫重陳重陳人心傷

又

孔翠耀文彩雕籬苦長羈冥鴻翔雲端弋者空慕思
踞踏牛絡錦容與龜曳泥洛下嘆陸生東門悲李斯

無利害豈及無榮辱焉施乃知沮溺流未可輕瑕疵

又

幽居悄長夜孤吟步中庭澄澄天宇靜金波淡微明
衆星何歷歷八九羅縱橫仰首望星月低頭念平生
星月豈不光無緣表忠誠四顧將何依黯然獨傷情

又

莽莽宇宙間人物何鎖屑志士欲自見慷慨負竒節
握瑾懷蘭荃冰霜凜孤潔造物忌皎皎萬事成瓦裂
世若無公言憤懣當泣血

又

萬事等芻狗所貴惟此身六鑿相披攘汨沒喪天真
人生非金石今古一旦昏朱顏不禁秋颯然變埃塵
古來賢豪士用世多苦辛身後竟如何漫有空名存
空名載方冊逝者寧復聞徒令雌黃徒顛倒播喉唇
飄搖廣成子脫屣離垢氛乘雲駕飛龍萬古誰能馴

又

我思避世士乃在匡山陬身與浮雲閒心與造物遊
躬耕豈不勞田野日休休有酒且孤斟得句還自謳
黃鵠舉千仞萬事同一漚孤懷信高褰清風邈難儔
望之不可及使我中心憂

又

我昔登岱嶽仗劔叩天關振衣翔千仞日月如可攀
縹緲雲霧低颯爽天風寒俯首視九州塵世何漫漫
相逢王子晉綠髮芙蓉顏授我紫霞篇飫我絳雪丹
招邀入太清陟降三神山後天永長存獨立超人寰
決擇苦不勇欲去更盤桓塵土汨没人萬事成波瀾
悔恨無由追撫膺但長嘆

又

鄙夫貪幸得志士無苟安義禮凜大防毛髮誰能干
介石不終日洪流激奔湍磊落開心胸自擬白日看

交遊亦滿眼知己良獨難願言推子心為我照肺肝

又

漆園有傲吏放言恣狂狎八荒為庭隅天地為蓋藏
大小等鵬鴟修短齊彭殤雖非中庸道理亦各有當
鴟鴞矜腐鼠木灾怨青黃彼其視萬鍾何啻一糝糠
英英威鳳騫矯矯神龍驤其人如可作吾當為褰裳

又

我有百鍊銅鑄為盤龍鏡製擬軒轅古色作寒氷瑩
外可毛髮鑑內可心膽靜持之遺靈脩期使萬象正
胡為衆妒興詆詬乃交併人心豈真昧物價諒有定

丁秋在世間誰能掩光頻

又

幽齋耿枯坐省心一爐香四十七年非往事空茫茫
我有綠綺琴轉絃調清商心緒紛如絲掩抑不成章
翩翩南來鴈嗷嗷雲外翔為予吐哀音黯黯增離傷
我有素心人遠在天一方安得與俱來執手語衷腸

又

幽人志林泉軒冕非夙慕軒冕豈不榮蹇薄寡所賦
鷹隼繫縲籠側目雲霄路野馬駕華軒畢竟非故步
一語辱監子拂袖悔其悞張子有嘉言碧山不予負

又

禍福相糾纏理數乃雜揉從來宇宙間萬事何不有
天道杳莫窺玄機默而黜吊者在衢路賀者在戶牖
想當造物時任情屈身肘盛衰本無常稱意詎能久
昨日東陵侯今朝種瓜叟

又

白雲出深谷團團似車蓋誰云本無心爲雨澤枯塊
飄風從何來吹落九州外依依不成雨負此色靈霽
出處寧固必舒卷乃無碍且復歸舊山氤氳鎮常在

又

嗟吁寡聞道當事力靡勝坐無涵養功憂樂苦纏縈
時當拂逆來淺中每怦怦雖無得失較不免寵辱驚
有客歎我堂慰言極慤誠上探元化理中述聖哲情
謂予子有得悄悄疑未平謂予子無得諒子心地清
丈夫志遠猷雅量包滄溟公論定身後瑣瑣焉足爭
我起拜謝客如醉寐得醒一洗芥帶胸烈日消春冰
佩服金玉言優游畢餘生

又

我有五畝宅迢迢東海隅有屋盈百椽有芋亦數區
曲欄接芳榭脩竹俯清渠過門無俗賓接席皆文儒

別來歲星周惆悵恒鬱紆豈惟負風月猿鶴皆怨吁
白雲何英英招邀與之俱誓將返吾轅歸讀先人書
達人委元化出處無定拘命運既已然徘徊將何如

翰林院敬一亭落成恭和 御製

宸章麗貞刻翼寵見茲堂吾 皇熙聖學文理何密
詳天德穆而純無少嗜好妨大哉敬一功勳華卓相
望乾坤際熙皞一德屬明良甄陶仰 聖謨報稱當
無忘

兩松

兩松誰移來眼底生突兀故人知我意惠與百金值

其高餘二尋其蔭可數席根柯大如盎謂是兩世物
當其初移時至費百夫力舁載勞車舟經從破垣壁
我初疑其艱不任遷徙厄培根致其深壅土致其密
其上維長綆其下鎮巨石邇來當炎熇高架障赤日
園丁苦奔命灌溉靡敢佚初時逮今茲冀莢亦屢易
天澤與人爲併至兩無失生意微發舒濯濯吐嫩碧
已見抽新芽相將結佳實幽勝增草堂磊落壓群植
浮生靡長世貞幹乃閱歷詎知百年後誰主亦誰客
大觀眇宇宙玄悟等空色因歌兩松詩一失聊自釋
使郢過比干祠

孤墳鬱嵯峨屹立古道右危祠亦虛敞綽楔出踈柳
使節偶經過一步一稽首仰瞻義烈姿千載尚不朽
憶當商季時忠佞雜紛揉君道固匪滅臣職其就剖
雖無心七竅實有血三斗皇天表忠赤並示百代後
茲墳不數仞蒿華等高原畜君義何尤戮諫邦必覆
古訓炳日星芳名垂宇宙

襄陽七懷

襄陽爲自古要地撫遺蹟吊往事有懷七人
馬因各賦詩一首

諸葛武侯

堂堂諸葛公道本伊呂匹方其未遇時龍卧沃淵嘿
一朝感時奮變化乃莫測恢復信本志爲漢誓討賊
大義凜昭揭乾坤爲開闢指揮動風雲忠誠貫金石
士生三代後聞見漸卑溺公也真天人正氣泰華敵
昇平禮樂具捨攘兵革日抱負鬱未施永爲後人惜
公神在天壤萬古終不沒再歌出師表歛衽三嘆息

龐德公

龐公大隱流世利迴莫干身如野鶴矯心與浮雲閒
刺史不能致候謁隴畝間夫耕妻出饁相對嘗怡顏
富貴得幾何憂患來無端善哉至人訓遺子獨以安

鹿門何高高遂志終盤桓避世深復深採藥遂不還
惟有遺跡存高風照人寰

羊太傅

太傳古遺愛德義孚遠邇豈有儒者風不作狙詐計
張皇師旅間表帶自容與敵國感其惠何止挾纊士
聖賢有不爲不以天下利不殺一不辜不行一不義
推公心所存或也其可企公績多漢沔愛戴極翁稚
公卒邦人悲走哭空里市峴山日巉巖漢水日瀰瀰
思公不可作反袂拭清涕

杜工部

少陵詩之聖渾渾元氣通尚論制作盛盡善如周公
胸藏五車書筆掃千軍雄輝煌三禮賦曾獻明光宮
平生用世志自許稷契同摧頽值時難坎軻悲途窮
兵戈苦騷屑黃屋當塵蒙崎嶇走行在飢寒迫其躬
操觚賦詩事宇宙歸牢籠勤拳社稷慮懇惻生民恫
凜凜忠毅色烈日明秋空上可繼風雅下應陋雕虫
一時旅人迹萬古詩壇宗九原倘可作執鞭吾當從

李翰林

白也真天才變化如神虬生平耻齷齪邁往隘九州
詞林昔供奉天子寵渥優一朝被讒構斥遠金殿頭

高情與逸思芥帶弗少留供奉非公榮夜郎非公憂
詩筆驅萬相醉眼輕王侯晞髮扶桑巔濯足滄海流
今古等一瞬天地同一漚以茲昔人言謂公似莊周
公去幾閱世公名重千秋誰云公則亡神爽八極遊
蓬壺隔弱水浩蕩不可求緬懷舊行踪使我心悠悠

孟浩然

浩然亦高人神思乃清朗讀書陋拘牽制行喜踈曠
賦詩妙天趣力索不可彷彿冲融大雅音金石振遺響
禁中遇天子召對心所向終焉意不合歸哉南山放
唐詩盛千古公也李杜行布衣一時窮高譽後人仰

我來經故里慨矣勞緬想鹿門當時月依依漢江上

張順

張貴附

襄陽昔受困虜騎何憑凌矯矯二烈士提兵援孤城
雪涕奮雄劔悲風起冥冥赤手蹈虎穴義氣孰敢撓
輕舟駕巨濤江水爲奔騰轉戰前無當勢若可橫行
惜哉天亡宋其功意無成一時雙玉節皎皎照日星
我來尋故壘黯慘愁雲凝草木爲號呼猶似戰伐聲
英魂凜赫赫萬古常如生

題大司空鶴山李公完名卷

造物靳全名君子慎晚節顛冥利欲途出處多玷缺

我觀鶴山翁行志亦已決當其直道時奸黨共媒孽
矯矯節乃見知幾保明哲其於視爵祿何啻吹一吷
皇心憫忠直天語極諄切完名兩大字星日共昭揭
雲卧閱寒暑甘心採薇蕨徵書復來朝八座揚茂烈
極知高世志夢想故山月我懷仲山父茲義久斷絕
俯仰千古情臨風且嚅囁

悲萱永懷挽鄭秋官母

北堂有萱草郁郁呈華滋西風動地至一夕吹殞之
荼毒遊子懷眼枯淚成血烏啼白露零中夜腸斷絕
淒涼舊縫在零落機杼寒豈無牲鼎祭不及生前懽

河水向東逝滔滔無休息此心明月如達旦不改魄
水亦有盡處月亦有虧時思親復思親一念無終期

和陶靖節止酒

陶翁詩止酒而實未嘗止反覆筆舌端沿襲答和裡
微醺見真性沉醜匪君子欲止意固佳初念亦可喜
愁止懽不來吟止興不起無量不及亂斯則有妙理
立言思久暫作戒度人已十詩酒八九浪說真止矣
此物爲世用廣博靡涯涘細數莫具陳大者偕禋祀

村居小景圖

迤邐山麓盡宛然見民居周圍自成村編籬植桑榆

隣比數十家樂生各愉愉老翁四五人霜雪爲鬚眉
一翁携稚子簷牙步徐徐一翁偕一媪偶坐自爲娛
一媪上堂來甘旨供舅姑一翁杖畦間課僕勤蓄畬
一翁立當壚有童執瓶沽一翁坐當席課諸童子書
一媪并一婦浣濯衣與裙一媪抱兒行在手復有携
一媪抱兒立惜弄若掌珠一夫睨其側咲視權有餘
一犬走吠人一犬卧當閭牛當樹陰息牧童坐風零
羊豕食而嘻鷄鶩相喧呼村有古朴風似是朱陳餘
應歎盜賊警抑復無征誅感此不易得想像增嗟吁

避寇移居入城

杜甫昔迹難年始届五十而乃自云衰奔走病纏骨
我已七旬四健步豈如昔而亦嬰禍患倉皇事潜匿
我以二品歸豈甫坐貧戚甫寓秦蜀地萬里苦行役
我不離鄉井止有城垣隔惟思骨肉親不免抱於悒
况當遠先祠回首淚沾臆仰叩天茫茫主宰祈監識

遷居述懷

元亮昔徙宅欲就素心人少陵善隣翁飲酒契誼真
我今來此居非爲卜其宅乾坤遘灾屯海寇肆鋒鏑
焚劫遍村墟殺人亂如蓬我既衰且病日處憂虞中
繆爲國大僚乞休恬晚歲可以不貲身乃爲盜賊

斃以茲挈妻孥造次來城居城中土地貴尺地寸金
如避難且淡薄而敢志寬美幸有此虛齋猶堪便寢
睡床頭一編書長日聊自娛薰風自南來恍似遊華
胥風塵尚簸蕩人心尚憂惕城守無須吏刁斗勤且
夕而我以老憊獨適心靡寧何當洗干戈四海歌清
平

孫文簡公灤溪草堂稿卷之十四 終

孫文簡公灤溪草堂稿卷之十五

五言律詩

為何養高題扇景二首

傲睨江天濶依依島嶼明
風林聞落葉烟渚看雲生
黃綺終堪隱巢由不慕名
為君占易畫履二得幽貞

又

約處惟求志逢人懶折腰
空山足盤礴幽境謝喧囂
野色連蒼莽詩情遡沈寥
掀髯誰與和涼吹自瀟瀟

搖落

搖落孤村晚江山一弊廬
頗憐賤子病重枉故人車

釀熟尊多酒溪深饌有魚百年寸心事相對一嗟吁
何處難忘酒二首

何處難忘酒茫茫宇宙間浮生無百歲壯志有千年
窮達非由我賢愚不係天此時無一盞心事向誰宣

又

何處難忘酒傷時變故多有心羞末俗無力障頽波
漠漠從誰問悠悠竟若何此時無一盞彈鋏不成歌

南齋十詠

南齋周先生以十物求題示不忘也原其意
作詩以表之

書籍吾家物經時脉絡穿香芸虛舊篋科斗半陳編
貽后真良產資身豈舊筌猶思疇昔遇日日共周旋

右蠹簡

貧賤舊時情年來怨不平床頭遶夙契墻角締新盟
苦窳非前見凄涼減夜明猶思疇昔遇相對坐深更

右廢檠

綠綺遺來久凋零漸不任尾焦存古製絃斷惜知音
難厠虞廷樂空含太古心猶思疇昔遇彈處月當襟

右舊琴

寶劍出吳鉤精光紫電流芳塵凝古匣銳鏘掩清秋

尚作蛟龍吼還令魍魎愁猶思疇昔遇懸佩上皇州

右塵劍

墨妙傳來敝書齋老歲華奔泉空渴驥入草失驚蛇
零落行春蚓模糊點暮鴉猶思疇昔遇摹榻愧薑芽

右敝帖

我愛丹青妙傳來歲月徂天機還慘淡繪色漸模糊
烟水渾明滅雲山空有無猶思疇昔遇曾費百金沽

右殘畫

素質明雲浪分來自剡溪卷舒曾未試篋笥已多時
覆瓿吾寧忍摛文子亦宜猶思疇昔遇心事重相期

右故紙

價擅烏金重研來滿硯香鴻文曾潤色豹橐費珍藏
已見規模缺應嗟歲月長猶思疇昔遇揮染走龍光

右餘墨

名著中書省曾誇戰捷還遺功尤未泯末路已驚難
鋒力慚新銳衰頽類老殘猶思疇昔遇橫掃涌濤瀾

右頽筆

我有端溪石人言紫玉堅文章經點染歲月老磨研
凹底雲根漏剝中兩腳聯猶思疇昔遇日日試松烟

右穿硯

過東禪寺友人書齋小酌二首

何處藏脩地禪房雲水東
院深無犬吠門僻有苔封
萬里看鷓鴣三冬困螿龍
不須悲世事且領一尊同

又

交情憐久別今日此尋君
話舊消清坐開樽對白雲
乾坤空落落世事摠紛紛
不盡流連意歸途已暮曛

貞軒詩

先民有遺訓末俗見斯人
自是甘肥遁誰能混世塵
行藏吾道在宇宙一身貧
高誼真堪託吾將與結隣

雪壑

密密復皚皚玄陰鬱不開
雨凝飄漸積風急去仍回
欲把蟻娥吊還將混沌猜
誰歎衰筇者沽酒過橋來

對雪

朔雪千林盛連天舞素靈
依依巧作態脉脉故無聲
只可如袁卧難爲訪戴行
小山渾不俗玉立更崢嶸

寄題儲芋西山亭和汪東麓韻三首

窈窕深穿壑嶽岑小築丘
川光涵鏡靜石氣雜雲流
花鳥娛幽興蒲荷足晚收
更聞貽後遠千卷貯層樓

又

古樹藏迂徑平臺對石橋
兩堤莽迴合一水故迢遙

鮭菜君家足林泉我興饒何當乘暇去吟賞判連朝

又

吾聞蓮塘曲儲子構名山石作三峰峙溪流九折灣
塵中有堯率海上見商顏羨爾萃奇勝誰言造物慳

都下卧病

卧病洛陽城不知時序更屢空諸客味數問荷交情
壯志因愁減衰顏覽鏡驚前程那可計休咎任浮生

送劉公勛乞終養歸

筮仕便辭歸寧親願不違私情烏鳥疏高興北山薇
花塢潘輿穩秋風菜綵輝嗟予望雲意為汝益翻飛

為戴道士題畫鶴

不逐腰纏客清溪歲月深

戴號清溪

朝從遊碧落夕返憇

瑤岑華表歸時語黃州去日心蒼茫明月夜兀立候

松陰

遷寓五首

客裡多遷次今茲始定居亦知同逆旅聊復認吾廬
隣訪新移客兒齊未展書終宵眠不穩明月照窓虛

又

雅志憐幽寂吾廬亦自宜城臨風到急地逼月來遲
病起身猶歎門扃客屢題幽懷無所寄多種菊花枝

又

門倚重城地心瞻咫尺天
最欣少塵事况喜近仁賢
斗室堪兒讀空庭足馬旋
宦途媿貧薄那敢過求全

又

突兀見危城天然烈障屏
開軒藉深穩壓棟自虛名
夕照樓臺麗秋風鼓角清
趨朝應自慣不用聽鷄鳴

又

是處誰非寓吾廬又再更
天涯淹久病客思喜秋清
歲月看人老拘牽咲此生
故園三泖上回首獨含情

邸中思家四首

寂寂書齋夜悠悠對短檠
異鄉千里夢故國一家情
歲晚風偏勁天空月正明
孤吟愁不寐戍鼓遞高城

又

白髮親齡暮青山客路長
經年千里信一讀九迴腸
最喜猶強飯深期早促裝
不知何歲月花底進霞觴

又

不見伯兄久荆花靜晚風
平生敦手足此日任西東
萬里看鴻鵠三冬困螯龍
不知今夜燭誰與一尊同

又

靜夜長如歲羈愁冷似灰
繆通京國籍虛負故園梅

不寐聞寒柝多情減壯懷無端窳落意一一上心來

題陶淵明畫

白日識歸心涼風吹葛巾世行元嘉曆身是義熙民
望裡停雲賦門前送酒人綠楊深匝戶別是一家春

雨

踈雨夜深聞朝來暝不分隨風看裊裊雜霧更紛紛
徑草添幽翠池波緘細紋居閒無晤語袖手對爐薰

竹

蔭屋交虛翠當窓送夕涼清聲時到耳濃露濕沾裳
老幹排籬出新稍落粉香再歌淇澳什不擬晉人狂

與諸友避暑河亭小酌

勝事聞河朔吾亭亦自宜東雲低結暝檻小淡生漪
竹韻清醒耳瓜漿冷沁脾况憐明月上歸興更遲遲

將曉

歷亂銀河落朦朧曙色微忽看入幽戶漸已透踈幃
物各知群動吾思欲攬衣幽居雖少事頽惰自非宜

幽事

幽事時時有閒居頗自便聽鶯留徙倚教鶴助踈蹊
掬水苔磯坐尋芳竹徑穿却憐城市裡車騎正喧填
和荅喻揚菴郡公五首

宇宙寬如許，卑棲但一枝。何期野人屋，欣得大賢詩。
高鳥冥冥去，飛花故故辭。美人隔秋水，無計鎮相隨。

又

種竹期三徑，栽花亦數枝。溪山餘遠興，天地入新詩。
塵世久成厭，清時難便辭。終當返初服，猿鶴共追隨。

又

遺老吾何敢，居閒得自怡。力耕聊卒歲，久病欲忘詩。
盛美嗟誰及，迂踈忝受知。最憐公務劇，扳屈媿無期。

又

卜築真成戲，幽棲任俗猜。登臨屈冠蓋，光彩動蒿萊。

自媿盤飧薄，能將懷抱開。迂踈或不棄，乘興肯重來。

又

叩戶醒殘夢，開門得好詩。驪珠驚到眼，宿疴忽如醫。
喜溢高歌久，才踈勉和遲。小亭成勝事，幽寂動春姿。

夜雨

小雨看終日，昏來灑更微。新涼透踈簟，餘潤濕書幃。
宿鳥翻枝警，流螢觸暗飛。雲間淡星月，時復見依稀。

雨不止再詠

黯黯連旬雨，陰雲只自浮。竹窓巢翡翠，粉壁上蝸牛。
野徑人行少，溪塘水漫流。病夫爲歲計，兀坐正含愁。

雨益甚再詠

浙瀝無時歇俄驚忽沛然疾奔橫迴野密灑暗長川
檻水看將溢茅堂懼欲穿蒼茫渾不解默默向穹玄

雨後邀友人

寂寞孫康宅幽懷若與論昨宵時雨過今日綠陰屯
傍檻先鋪簟臨流重洗尊即看能枉駕候子立柴門

雨中和荅友人

風雨飄蕭至烟霏日夕深二儀莽迴合萬象盡陰森
龍螭慙高隱鶴鳴懷好音何由得聯席重話百年心

雨止

稍稍風生樹踈踈雨散痕清溪明素練斜日爛頰盆
粉蝶過吟慢沙鷄舞竹根幽尋何可已擬一過前村

和荅詹東魯年兄

寄興有孤亭居貧亦自清野花當檻落山鳥近人鳴
雅意師樊子多才媿長卿此心無俗累永夜月同明

臘月過東庄命園丁挿柳

寂寂東庄晚蕭蕭風正嚴柳陰常媿薄此月更應添
未擬成深徑還教覆短簷明年看翳鬱雲幕映青帘

和張石盤侍御年兄過訪之作二首

倒屣迎驄馬焚香共草堂情因罇酒洽興逐野雲長

子特來乘暇吾翻得少忙不緣重交誼經月嬾冠裳

又

曲徑通蔬圃清溪帶草堂野花隨意好鳴鶴向人長
得得閒中趣悠悠物外忙偶聞談出處爲子欲褰裳

贈別石盤二首

道誼交情重江湖別意深清樽聊此話何日更同斟
慷慨悲時事蹉跎媿壯心向來憂國淚相對各沾襟

又

去去從此別重逢亦杳然乾坤雙眼潤歲月寸心懸
失學嗟予病憂時念子賢明朝何處望風雨隔江天

東里草堂二首爲表兄賦

屋後桑麻長簷牙鳥鵲喧叢篁深夾徑喬木翠當軒
自適清真態都無俗累煩優游百年內此外更何言

又

吾生厭塵俗羨子得深棲座有鴻生至門無鳳字題
綠蒲抽水直朱果壓枝低此日從君飲真拚醉似泥

晨起

避俗常忻靜晨興亦不妨疎星映幽戶寒露落芳塘
花竹輝書幌琴尊靜草堂不緣有幽事自是惜流光

秋夜

露下聞蛩早城中擊柝頻驚風時攪樹明月似窺人
壯志看雄劔中年歎病身悲歌還出戶徙倚望星辰
雨後過友人別業

雨過郊原淨幽居愜老夫弄晴花欲語得意鳥頻呼
風柳千絲裊烟莎一望鋪欲過故人話須挈杖頭壺
克嗣姪婢姻示以詩二首

爾父違而早天遺後死悲友于情曷已對汝淚空垂
鞠育歸惟我承傳係有誰室家大人行須效大人爲

又

造次嗟貧薄區區畢此心都將百年淚一徹九泉深

儒素由來舊家風豈獨今淫吝人易溺俛仰一沉吟

題便面二首

寂歷青山晚悠然似古春溪雲生白石茅屋斷紅塵
嵐重渾疑兩山深不遇人祇應橋下水照見白綸巾

又

脫屣浮雲遠幽居賦考槃秋衣裁薜荔長佩纈芝蘭
白日吟邊過青山天際看松風驚謖謖吹我切雲冠

春日放舟

鼓楫春江上幽懷無柰何輕風泛蒲柳斜日蕩煙波
歲月雙吟屐乾坤一釣簑濟川成底事吾意漸蹉跎

病起二首

一卧兼旬日居然怯病魔山中寡塵事靜裏見天和
隣父抄方送門生載酒過朝來頗強健還我稱弦歌

又

久病朝來懶徐行力尚慵幽花渾自媚野鶴故能從
望遠勞昏皆臨池歎瘦容焚香還靜坐書卷任飄風

爲楊士行題扇景二首

士行號晴川

林木散清霽微風度水遲扁舟蕩落日紅色照吟髭
逸興孤雲遠閒情白鳥知美人渺何許幽賞共襟期

又

老樹頽崖石輕舸拂渚磯水花含晚淨沙鳥近人飛
涼吹還欹帽晴雲欲染衣何由添入我吟倚對斜暉

又題扇景

碧漢烟俱歛幽巖花欲然美人多逸興載酒過前川
傲睨天垂野嘯歌風滿舡何當三泖上似爾亦飄然

七月廿七日借曹錦溪舟出郭小泛戲作呈舟

又一味二首

畫舸隨潮發幽懷頗自宜鷺移叅別渚蟬咽送高枝
碧水靜風浪黃花驚歲時世途多感慨吾意欲何之

又

文苑英華卷之五十一
十一
搖落楚江湄秋風獨棹時孤雲淡離思斜日照吟髭
忽想橫江鶴因看入水鷓天隨有真趣吾欲共襟期
月夜露坐甚適

月出炎氛息空庭爽氣浮斗杓初北指河漢欲西流
竹卧橫侵榻螢飛徑過樓坦然無俗累自覺興優游
督園丁溉菊

元亮歸來興黃花歲晚心數枝渾自秘九日漫將臨
會見風霜肅全資灌溉深東籬吐幽艷我欲對清吟
獨坐

旭日照簷楹高齋虛更明閉門幽意愜隱几篆煙清
野鳥每雙下林蟬時一鳴敢云拋世累暫爾學無生
次韻謝吳黃洲郡守過訪

瞻企時常切追陪此日親偶同山簡興來賞習池春
真率惟蔬具迂踈愧野人醉餘猶自整隨意岸烏巾
借韻述懷二首

地僻塵喧少幽居誰與親琴樽消俠氣花柳媚長春
感事頻懷古逃名欲避人百年天地裡白日照烏巾
又

避世非吾事幽居迹頗同石田鋤夜月茅屋領春風
文債蹉跎有江天夢寐空懷人渺無極望入沈寥中

九月

天上繁霜降人間秋色深千林飛落葉萬戶動踈砧
憔悴潘郎鬢低回宋玉心吟詩欲排悶哀詠更難禁

菊

野菊叢叢艷清香細細寒孤根謝桃李幽致契芝蘭
欲共陶翁醉思遺屈子餐小齋明棊几移得一枝看

秋日泛舟

幽意渺無著溪邊掉小舟天晴鳴野鶴浪穩趁輕鷗
不俟鑑湖請聊同笠澤遊悠悠隨所適吾欲聽漁謳

秋晚村行

步屨江村晚西風小作秋深林喧鳥雀落日下羊牛
機杼千家共田禾一望收偶同野老話鷄黍爲遲留

悲秋

海上涼風動山中秋日深百年摧短景萬里接層陰
凍葢依時放寒蟬戀樹吟平生搖落意卧病更難禁

觀刈稻

秋霽郊原淨平疇刈穫空千林留夕照隔塢聽高舂
數口勞生計三時念僕功流移多未復能得幾家同

和郭杏岡秋日漫興十二首

禁密隣天上清閒學灑西風光不相負筆硯且幽棲

徑僻花通牖階深蘚護泥興來得佳句自向壁間題

又

雨後蛙喧吹風前鶴報衙觀書焚栢子臨帖泛松花
客至簷鳴鵲天晴晚散霞此中清寂甚底處着紛縟

又

院靜如僧寺宮閒類隱居凍雲低接樹露井暗通渠
慮淡入禪定心遊到古初自知迂拙甚底處曳吾裾

又

忽忽悲時事悠悠念此心道窮知己少性僻避人深
樹色陰連屋花香淡拂襟儘於疎懶便無補費光陰

又

虛館深秋色閒情坐日西幽花當檻落小鳥傍簷棲
石剝苔漫砌天書鶴篆泥雖無觀物妙興至亦堪題

又

間官稀候吏玉署例槐衙樹隙鳥窺牖水邊魚唼花
斷虹低返照殘雨亂明霞自是神仙境幽幽遠世譁

又

未老先欣懶辭人慣索居愛花頻葺土引水亦穿渠
乳燕離巢後高梧落葉初時防候謁吏聊復整冠裾

又

信步獨行吟悠悠太古心鳥聲聽處慣山色望中深
憇石頰搔首臨風一振襟片雲應送雨小院落虛陰

又

喜看殘暑退短景日行西兀坐偏神爽冥心與道棲
風輕蛛葺網雨過蚓蟠泥詩拙慚人看唯應僻處題

又

庭空下饑雀吏散早休衙引鶴尋芳草教童掃落花
有書消白日無句詠青霞市遠人聲靜真堪斷俗譁

又

林宗好孫子如我好間居得句頻貽我論交最憶渠

異聞多白帖妙句擬黃初薄劣真無似深漸共曳裾

又

慷慨千年事低回一寸心行吟白日晚悵望碧雲深
曠志思超世虛懷不滿襟濟時吾豈敢卷裡較陶陰

春日漫興用前韻十二首

徙倚當清晝花陰漸轉西小詩妨實學野性愜幽棲
排闥迎山色移床避燕泥無邊風物好隨意入新題

又

吏隱吾兼得高齋休早衙琴樽消意氣風日醉鶯花
撫石衣生潤臨書字剪霞極知成散誕聊復避諠譁

又

自任清真態難同木石居花濃陰照砌草細淺籠渠
正是蚕眠候相將麥熟初城南聞更好欲向滌塵裾

又

踈拙從吾性幽閒快賞心斷雲隨鳥沒清漏隔花深
聊適吟中趣誰題漢上襟小庭成久坐茂樹有餘陰

又

坐惜春將晚行吟日又西鳥皆忻競啄鶴只愛孤棲
淡蕩頗催煖庶織不作泥詩成託朋輩絕勝竹間題

又

近侍元非吏瀛洲豈是衙有鶯皆喚友無樹不飛花
點易研清露希真咀絳霞從來輕世務不獨厭紛譁

又

此日江南景吾思水竹居檻邊巢翡翠花底戲雛渠
遊客提壺處農家布谷初懷人邈難即誰與共襟裾

又

節物隨時變浮雲任此心花香捲幔入草色閉門深
感事空彈鋏懷賢每正襟留連未歸去斜日度輕陰

又

厭俗俗難避望山山更西獨憐玉署靜時有白雲棲

對此花成陣何妨醉似泥好吟吾亦癖重和隔年題

又

澹澹雲生暝陰陰日過衙小窓穿燕子高棟拂楊花
調瑟絃流水醪醇竿泛霞出門即塵市車騎正喧嘩

又


喜有同心友時來慰索居清談成款洽高誼正勤渠
消息占羲畫幽玄邈太初却憐寡昧者還此愧襟裾

又

對景忽無語何人識此心尋花穿屈曲洗硯汲清深
小鼎時添火晴窓漫解襟踏枝何處雀攪碎一庭陰

送余子華歸省

詔許寧親去爭看太史歸春深花霧重寒退柳風微
越嶺茶堪摘姚江鰈正肥因君動余興夜夜夢班衣



孫文簡公集卷之五

七

